



Jumat, 24 November 2023

Ogen: 1 Korinti 13:8



Kekelengen La Erkeri-kerin



U sur kal ibelasken “kasih ibu sepanjang jalan.” Kata enda jadi gelemen si njemba nande tetap encidahken kekelengen si la erkeri-kerin nangdangi anak-anakna.

Kai pe ilakoken dingin iperjuangken man anak.

Wari enda nulih kita ku bas kata bijak sinibelasken Honore de Balzac sekalak penulis novel asalna Perancis nari nina “*cinta sejati itu abadi tanpa batas dan selalu menyukai dirinya. Cinta sejati seimbang dan murni tanpa kekerasan. Cinta sejati tetap terlihat bersama memutihnya rambut namun selalu muda di hati*” Arah kata sinibelasken e teridah kekelengen e lit lalap bas kegeluhen, mbaru teptep wari dingin la erbosan-bosan.

Paulus pe nuriken man perpulungen Korinti maka kerina si lit i bas doni enda, subuk ernubuat, ngerana i bas erbage-bage cakup Kesah bage pe pemeteh bas paksana masap me. Tapi kekelengen la erkeri-kerin. Kekelengen e palas i bas ngelakoken dingin ndalani kegeluhen. I ja lit kekelengen i je lit kegeluhen, i ja lit kekelengen i je lit kengasupen ngaloken kalak sideban subuk bagi ukur entah lang. Jesus reh ku doni enda alu palas kekelengen kap ngenca. E maka kerina si ilakokenna dingin si ibelaskenna pelin-pelin kekelengen. Kita enda anak-anakNa si ngumban biak si lit i bas diriNa. Kegeluhen sinicidahken kita teptep warina arus ipalasi kekelengen. Reh buena kekelengen sisehken, reh buena kap biak Dibata sinicidahken kita.

Moria si itandai kalak selaku nande, i bas dirinta dem kekelengen. Kekelengen e ngkuasai pusuh peratenta gelah tergejap dingin ernanam nandangi sekelewetta la terjeng man anak ras perbulangenta tapi seh pe ku sangkep geluh, perpulungen bage pe masyarakah. Lanai engkirai kekelengen si enggo isehken, tapi tetap ras teruslah nehken kekelengen e sabap e biakta kap.

☞ “Kekelengen Jesus jemba kita tetap ncidahkene kekelengen”

